

Hubungan Sosial Warga Tua dengan Anak Dewasa: Kes Masyarakat Desa Kelantan

WAN IBRAHIM WAN AHMAD
ZAINAB ISMAIL

Abstrak

Hubungan sosial dengan anak-anak dan ahli keluarga amat penting kepada kehidupan seorang warga tua. Hal ini kerana apabila seseorang meningkat usia, keluarga menjadi semakin penting kepada individu sebagai tempat untuk mendapatkan sokongan. Oleh itu, isu hubungan antara warga tua dengan anak dewasa mereka dirasakan perlu dianalisis. Kajian ini bertujuan untuk meneliti persoalan hubungan ini yang dilakukan daripada perspektif warga tua itu sendiri. Dengan menggunakan data yang diperolehi daripada temu bual bersemuka ke atas 214 orang warga tua berumur 60 tahun dan lebih yang tinggal di kawasan desa di Kelantan, kajian ini telah menyelidiki pola, kekerapan lawatan serta kualiti hubungan antara warga tua dengan anak dewasa mereka yang tinggal berjauhan. Hasil kajian menunjukkan anak dewasa merupakan sumber hubungan sosial yang penting; sementara hampir separuh anak dewasa ini didapati kerap melawat ibu bapa mereka; dan kedua-dua warga tua dan anak-anak dewasa masih merasakan mereka adalah amat penting kepada kedua-dua belah pihak.

Kata kunci: *Warga tua, hubungan sosial, sokongan.*

Abstract

Social relationship with children and relatives is very important for the life of older people. At old age, family is becoming increasingly important to the individuals as a place where they can find support. Indeed, social relationship between older people with their adult children is particularly important to analyze. This paper is intended to examine various aspects of the relationships, examined from the perspective of elderly parents. Utilizing data from a face-to-face interview with 214 Malay rural residents in Kelantan aged 60 years and older, this study investigated patterns, frequency of visit, and quality of relationships between elderly parents and their adult children who live separately. Results revealed that adult children are important sources of social relationships; while nearly half of the adult children have frequently

visited their elderly parents; and both elderly parents and their adult children perceived they were very important for each other.

Keywords: *Older people, social relationships, support.*

Pengenalan

Sekarang ini dunia sedang berhadapan dengan satu fenomena baru, iaitu penuaan penduduk. Kinsella dan Wan He menyatakan setiap bulan dunia mendapat pertambahan bersih penduduk berumur 65 tahun dan lebih sebanyak 870,000 orang. Malah pada tahun 2010, pertambahan bersih ini berlipat ganda menjadi 1.9 juta sebulan (Kinsella & Wan He, 2009) dengan pertumbuhan yang paling ketara ialah di negara membangun (Wan Ibrahim & Zainab, 2006). Kategori penduduk ini dijangka bertambah daripada 264 juta orang dalam tahun 1980 kepada 828 juta dalam tahun 2025, dengan pertambahan sebanyak tiga kali ganda (Pertubuhan Bangsa-Bangsa Bersatu, 1991). Berdasarkan jangkaan ini, pada 2025, bagi setiap tujuh penduduk dunia terdapat seorang warga tua berumur 65 tahun dan lebih (Myers, 1990). Oleh itu, semua keluarga dijangka akan mempunyai warga tua di dalamnya.

Sehubungan itu, aspek hubungan warga tua dengan anak menjadi satu aspek menarik untuk diteliti. Hubungan sosial antara warga tua dengan anak dewasa banyak dikaji di luar negara, tetapi masih belum meluas dibincangkan di Malaysia. Beberapa persoalan seperti bentuk hubungan, kekerapan lawatan serta kualiti hubungan antara warga tua dengan anak dewasa mereka dalam konteks Malaysia masih belum diteroka sepenuhnya. Warga tua adalah satu konsep yang sukar untuk didefinisikan. Kamus Dewan (1993) menggunakan istilah orang tua bagi menggambarkan warga tua. Orang tua didefinisikan sebagai orang yang sudah lama hidup; sudah lanjut usia (tidak muda lagi); atau sudah berumur. Kamus Webster (Gove, 1966) pula mendefinisikan orang tua sebagai orang yang telah meningkat umur. Oleh itu, warga tua secara umumnya merujuk kepada seseorang yang sudah lanjut usianya atau tidak muda lagi. Oleh kerana adalah konsep yang subjektif, maka adalah sukar untuk menentukan bila seseorang itu sepatutnya dikatakan tua. Ada orang dari segi umur kronologinya masih muda, tetapi sudah kelihatan tua.

Kalish (1982) menyatakan tidak ada jawapan yang tepat yang boleh digunakan untuk mendefinisikan bila sepatutnya seseorang dikatakan tua. Bagaimanapun, beliau menyarankan empat pendekatan yang boleh diguna untuk mendefinisikan warga tua. Pendekatan pertama ialah mendefinisikan warga tua berdasarkan umur kronologi iaitu seseorang dikatakan tua apabila mencapai umur 65 tahun. Pendekatan kedua berdasarkan perubahan fizikal yang

terjadi pada diri seseorang. Perubahan ini meliputi perubahan bentuk tubuh badan, raut muka, warna rambut, pendengaran dan penglihatan. Pendekatan ketiga berdasarkan peranan sosial, iaitu seseorang boleh dikatakan tua apabila telah mencapai umur persaraan, sudah tidak lagi bekerja, atau sudah menjadi datuk atau nenek. Manakala, pendekatan keempat ialah mendefinisikan warga tua berdasarkan persepsi individu itu sendiri mengenai dirinya sama ada dia merasakan masih muda, sudah merasa tua atau sebaliknya.

Atchley (1988) pula menyatakan terdapat tiga pendekatan yang boleh digunakan untuk mendefinisikan warga tua, iaitu berdasarkan umur kronologi, kemampuan fungsional dan peringkat kehidupan seseorang. Berdasarkan umur kronologi, seseorang dikatakan tua apabila mencapai umur 60 atau 65 tahun. Daripada perspektif kemampuan fungsional, seseorang yang pelupa atau kurang pendengaran umpamanya, selalu dikaitkan dengan umur tua. Berdasarkan kepada peringkat kehidupan, individu akan melalui empat peringkat kehidupan, iaitu peringkat kanak-kanak, remaja, dewasa dan zaman tua dalam proses perkembangannya. Berdasarkan pendekatan peringkat kehidupan ini, peringkat kanak-kanak dan peringkat tua merupakan peringkat yang amat memerlukan penjagaan (Cantor & Little, 1985). Selain penjagaan, warga tua juga memerlukan adanya hubungan sosial.

Para sarjana sosiologi dan psikologi sosial mengakui hubungan ibu bapa-anak merupakan salah satu hubungan sosial yang paling kuat dan boleh membawa implikasi penting ke atas perilaku, sikap, nilai serta penyesuaian diri warga tua (Durkheim, 1952; Parson & Bales, 1956; Erikson & Empey, 1963; Umberson, 1989). Moss, Moss dan Moles (1985) umpamanya menyatakan anak-anak dan ibu bapa adalah penting kepada kedua-dua pihak di sepanjang tempoh hidup. Cantor dan Little (1985) pula menyatakan hubungan dan sokongan sosial adalah penting kepada kesejahteraan warga tua. Dengan adanya hubungan sosial, warga tua dapat menyumbang peranan (*role*) sosial mereka. Sumbangan peranan sosial kepada ahli keluarga, kawan dan jiran tetangga adalah penting kerana ia berkaitan dengan kesejahteraan. Pada peringkat tua, keperluan kepada sokongan meningkat disebabkan perubahan ke atas aspek fizikal dan sosial (Stoller, 1985), di samping perubahan ke atas aspek kesihatan dan psikologi (Cantor, 1980), dan hal ini mengakibatkan aspek sokongan dan hubungan sosial menjadi penting kepada warga tua.

Sehubungan itu, hubungan di antara anak dengan ibu bapa menjadi tumpuan para pengkaji untuk dianalisis. Walaupun banyak kajian telah dilakukan ke atas aspek ini, tetapi analisis adalah dibuat ke atas hubungan daripada perspektif anak, sementara persoalan hubungan ini yang ditinjau daripada perspektif warga tua itu sendiri jarang diberikan perhatian. Oleh itu, kajian ke atas aspek ini didapati mengabaikan satu aspek penting hubungan iaitu persepsi warga tua itu sendiri ke atas hubungan tersebut.

Anak Dewasa sebagai Jaringan Hubungan Sosial

Hubungan sosial amat penting kepada kehidupan seorang warga tua khususnya di kawasan desa (Wan Ibrahim Wan Ahmad, 1999). Berdasarkan pemerhatian, penduduk desa boleh diertikan sebagai penduduk yang hidup dalam satu perkampungan kecil yang berbentuk pengelompokan beberapa buah rumah di kawasan pertanian, di sepanjang tebing sungai atau jalan raya atau terdiri daripada rumah terpencil yang terdiri daripada satu buah rumah atau dua buah rumah. Dalam situasi ini, kebanyakan rumah warga tua didapati berhampiran atau dikelilingi tiga atau empat buah rumah lain. Dalam keadaan ini, jiran tetangga atau anak-anak dewasa adalah penting sebagai sumber jaringan sosial bagi warga tua. Hubungan sosial yang dimaksudkan dalam kajian ini ialah hubungan antara warga tua dengan anak dewasanya. Hubungan sosial boleh terjadi bukan sahaja antara warga tua dengan pasangannya, tetapi juga boleh terjadi dengan anak-anaknya, ahli keluarga, sanak saudara, kawan-kawan ataupun jiran tetangga.

Hubungan sosial merupakan hubungan timbal-balik individu dengan individu, dan ia terjadi apabila individu itu berinteraksi dengan individu yang lain (Atchley, 1988). Ting Chew Peh (1988) menyatakan hubungan sosial ini melibatkan dua atau lebih individu atau kelompok yang melibatkan tindakan saling balas membalas tingkah laku untuk saling pengaruh mempengaruhi individu lain. Semasa seseorang mengadakan hubungan sosial, wujud saling jangkaan di antara pihak-pihak yang terlibat. Mereka akan cuba menjangkakan apa yang akan dilakukan oleh orang lain dan seterusnya akan cuba menyesuaikan tindakan supaya selaras dengan kehendak dan tindakan orang lain. Luas atau tidak hubungan sosial warga tua ditentukan oleh luas atau tidak jaringan hubungan warga tua. Jaringan hubungan dikira berdasarkan kepada berapa ramai individu yang selalu berhubung, sama ada pasangan, anak, adik beradik, sanak saudara, jiran ataupun kawan-kawan, atau bahkan dengan sesiapa sahaja yang dianggap penting atau akrab dengan warga tua itu sendiri.

Antonucci (1985) menyatakan suatu jaringan hubungan sosial mengandungi titik-titik dan ikatan yang menghubungkan dua titik, yang bererti menghubungkan dua individu yang saling berhubung. Oleh itu, jaringan hubungan sosial terdiri daripada individu atau kumpulan individu dan dalam konteks warga tua, individu ini penting untuk menyediakan sokongan. Individu yang saling berhubung, berinteraksi dan saling bertukar sokongan adalah termasuk dalam suatu jaringan hubungan sosial. Dalam konteks ini, Walker, Macbride dan Vachon, (1977) mendefinisikan jaringan hubungan sosial sebagai suatu kumpulan manusia yang saling berhubung yang membolehkan seseorang individu mempertahankan identiti sosial dan menerima sokongan.

Salah satu sumber hubungan sosial penting warga tua ialah anak-anak atau ahli keluarganya. Kebanyakan kajian yang pernah dijalankan di negara maju mengenai hal ini menunjukkan warga tua tidak diketepikan, malah turut menjalinkan hubungan yang erat dengan anak-anak mereka. Rossi dan Rossi (1990) contohnya mendapati kebanyakan warga tua mempunyai ahli keluarga dekat yang tinggal berdekatan, di samping itu warga tua ini selalu berhubungan dengan ahli keluarga mereka walaupun tinggal berjauhan melalui ziarah, telefon atau surat.

Shanas (1980) dalam kajiannya di negara maju menunjukkan hampir 80 peratus warga tua yang dikajinya bertemu dengan sekurang-kurangnya seorang anak sekali dalam seminggu. Oleh itu, di negara maju ahli keluarga adalah sumber hubungan sosial warga tua, walaupun warga tua di sana lebih suka hidup dan tinggal sendirian (Troll, Miller & Atchley, 1979). Memandangkan pentingnya keluarga sebagai sumber hubungan sosial yang wujud disebabkan ikatan emosi mereka yang terjalin sejak sekian lama (Rosenmayr, 1977), maka warga tua tetap memilih tinggal berdekatan dengan ahli keluarga (Gibson, 1981) dan walaupun tinggal berjauhan mereka membentuk keakraban dalam kejauhan (Rosenmayr, 1977) melalui hubungan kunjung mengunjung atau melalui telefon (Gibson, 1981).

Literatur di negara maju berkaitan hubungan antara generasi menunjukkan jantina mempunyai pengaruh yang penting ke atas hubungan warga tua dengan keluarga. Kajian di negara maju mengenai pengaruh jantina ke atas hubungan warga tua dengan keluarga secara konsisten menunjukkan hubungan yang lebih kukuh wujud antara ibu dan anak perempuan dewasa berbanding lain-lain kombinasi (Suitor & Pillemer, 1988). Antara contoh hasil kajian mengenai hal tersebut ialah ibu melaporkan ikatan perasaan yang lebih positif dengan anak perempuan berbanding anak lelaki (Angres, 1975), ibu lebih cenderung bergantung kepada anak perempuan sebagai penghibur atau orang kepercayaan untuk mencurahkan perasaan, ibu kurang cenderung untuk marah kepada anak perempuan (Lopata, 1979), atau kurang kecewa berbanding anak lelaki (Aldous, Klaus & Klein, 1985).

Anak perempuan dewasa melaporkan mereka lebih rapat dengan ibu berbanding bapa (Cicirelli, 1981), lebih cenderung bergantung kepada ibu sebagai orang kepercayaan (Suitor, 1984), dan dianggarkan konflik di antara ibu dengan anak perempuan agak kurang (Suitor & Pillemer, 1988). Anak perempuan dewasa juga dilaporkan melaksanakan aktiviti penjagaan yang lebih berbanding anak lelaki (Horowitz, 1985). Berdasarkan semua kajian itu menunjukkan warga tua di negara maju tidaklah diketepikan oleh ahli keluarga, sebaliknya terus menjalinkan hubungan yang erat walaupun tinggal berjauhan.

Dalam konteks masyarakat desa di Kelantan, kajian ini mendapati hubungan sosial sama ada dengan saudara mara, ahli keluarga, sahabat

handai atau jiran tetangga adalah masih dipentingkan. Semangat gotong royong, tolong menolong dan percaya mempercayai didapati masih jelas. Kerjasama juga mudah diperolehi kerana ahli-ahlinya diperhatikan sebagai bersatu padu, bertolak ansur dan saling mengambil berat. Ahli masyarakat yang hidupnya tidak memperdulikan orang lain, yang hidupnya bagai enau dalam belukar, melepaskan pucuk masing-masing didapati tidak dipedulikan oleh masyarakat tempatan. Semua ahli komuniti dikehendaki terlibat dalam jaringan hubungan sosial. Namun, bagaimanakah hubungan sosial warga tua desa di Kelantan dengan anak dewasa mereka? Anak dewasa dalam artikel ini ialah anak dewasa bujang dan berkahwin yang tinggal berasingan, bukan anak dewasa yang tinggal serumah dengan warga tua. Tujuannya adalah untuk membezakan hubungan yang terjadi bukan secara kebetulan. Hubungan di antara warga tua dengan anak dewasa merupakan satu aspek penting kepada warga tua. Umberson (1992) menunjukkan semakin tinggi kualiti hubungan di antara anak dewasa dengan ibu bapa semakin tinggi tingkat kesejahteraan ibu bapa. Apabila umur tua sumber hubungan sosial akan berkurangan, sebaliknya hubungan sosial dengan anak-anak tetap kekal.

Kawasan Kajian dan Metodologi

Bagi menganalisis hubungan warga tua dengan anak dewasa secara lebih terperinci, perbincangan dalam kajian ini diasaskan kepada data yang dikumpul dalam satu kajian yang dilakukan di kawasan pedesaan negeri Kelantan pada akhir 1990-an. Bagi mengenal pasti perubahan dan kesinambungan kehidupan warga tua, pemerhatian terus dilakukan antara tahun 2000–2005, dan 2006–2010. Daerah Limbongan, Kelantan dipilih sebagai kawasan kajian.

Masyarakat luar bandar di Malaysia, khususnya masyarakat luar bandar Kelantan berjaya menarik minat ramai pengkaji. Oleh itu, kajian ke atas masyarakat luar bandar di Kelantan bukan satu usaha yang baru. Usaha seperti ini telahpun dirintis sejak tahun-tahun 1930-an dulu lagi (Ishak Shari, 1988). Antara masyarakat luar bandar di Kelantan yang pernah menjadi tumpuan para pengkaji ialah masyarakat nelayan di Prupok, Kelantan oleh Raymond Firth dan isterinya Rosmary Firth pada akhir tahun 1930-an dan awal 1940-an. Pengkaji lain yang turut mengkaji masyarakat luar bandar di Kelantan ialah Nash (1974), Kessler (1978) dan Ishak Shari (1988).

Raymond Firth (1990) memulakan kajiannya pada tahun 1939–1940. Hasil kajiannya telah diterbitkan di London beberapa tahun kemudiannya. Tujuan kajiannya adalah untuk mengkaji organisasi ekonomi perikanan masyarakat nelayan Melayu di Prupok, Kelantan. Buku edisi barunya yang diterbitkan oleh Dewan Bahasa dan Pustaka memaparkan masalah ekonomi

kaum tani di kawasan pesisir negeri Kelantan. Hasil kajiannya menunjukkan gambaran tentang struktur ekonomi dan gambaran sosiobudaya nelayan Melayu di Pantai Timur sebelum Perang Dunia Kedua sehingga tahun-tahun 1960-an. Isterinya Rosmary Firth dalam masa yang sama turut mengkaji aspek domestik bersama aspek sosial dan ekonomi masyarakat tani Melayu di Kelantan. Ishak Shari (1988) turut mengkaji masyarakat nelayan di Prupok, Kelantan. Kajian oleh Ishak menganalisis struktur, ciri dan masalah masyarakat luar bandar di Kelantan mempunyai hubungan yang rapat dengan sejarah kolonialisme, imperialisme dan sistem ekonomi kapitalis dunia.

Daerah Limbongan yang menjadi tumpuan kajian terletak dalam jajahan Pasir Putih, di negeri Kelantan. Jajahan Pasir Puteh yang mempunyai keluasan kira-kira 433.8 kilometer persegi, merupakan jajahan kelima terbesar daripada sepuluh jajahan di negeri itu. Dengan kedudukannya di antara garis lintang $50^{\circ} 44' \text{U}$ - $50^{\circ} 50' \text{U}$ dan garis bujur $102^{\circ} 18' \text{T}$ - $102^{\circ} 26' \text{T}$, jajahan Pasir Puteh terletak kira-kira 41km ke arah tenggara dari Kota Bharu, ibu negeri Kelantan. Jajahan ini bersempadankan jajahan Bachok dan Kota Bharu di utara, Macang di sebelah barat dan Besut, Terengganu di selatan. Daerah Limbongan, dengan keluasan 16.217 km persegi, mempunyai enam buah mukim, iaitu mukim Pengkalan, mukim Gong Chapa, mukim Wakaf Bunut, mukim Alor Pasir, mukim Tok Adam dan mukim Bandar (Jadual 1).

Jadual 1

Pembahagian Mukim dan Keluasannya di Daerah Limbongan*

Mukim	Keluasan (km persegi)
Pengkalan	1.2
Gong Chapa	4.1
Wakaf Bunut	1.6
Alor Pasir	4.4
Tok Adam	3.9
Bandar	1.0
Keluasan	16.2

Sumber: Majlis Daerah, Pasir Puteh (1996).

* Pembahagian berdasarkan Mukim Penggawa.

Berdasarkan banci daerah Limbongan mempunyai 14,464 orang penduduk. Daripada jumlah tersebut, 6,835 orang (47%) lelaki, dan 7,619 orang (53%) perempuan. Jumlah ini adalah 15 peratus daripada penduduk jajahan Pasir Puteh yang berjumlah 96,348 orang. Dari segi taburan penduduk, kesemua mukim di daerah Limbongan menunjukkan taburan yang hampir

sekata. Bagaimanapun, seramai 8,664 orang atau 60 peratus penduduk bertumpu di mukim Bandar menjadikan mukim ini sebagai mukim yang mempunyai penduduk paling ramai. Tingginya bilangan penduduk yang mendiami mukim Bandar mempunyai kaitan dengan status mukim tersebut sebagai pusat bandar dan pusat pentadbiran bagi jajahan Pasir Puteh.

Di mukim Bandar, terdapat pelbagai kemudahan awam yang penting seperti sekolah menengah, pusat kesihatan dan klinik swasta, pejabat pos, bank dan perpustakaan awam, yang telah menarik minat ramai penduduk untuk bertumpu di mukim tersebut. Faktor lokasi dan jarak juga memainkan peranan penting kenapa penduduk banyak tertumpu di mukim Bandar. Mukim Bandar merupakan tempat persinggahan lalu lintas dari Kota Bharu atau tempat lain di negeri Kelantan yang menuju Kuala Lumpur atau Pulau Perhentian. Mukim yang lain, umumnya agak ke pedalaman dan mempunyai darjah kesampaian ke bandar-bandar seperti Kota Bharu, Kuala Besut dan Pulau Perhentian atau Jertih yang agak rendah.

Responden kajian ini ialah warga tua Melayu yang berumur 60 tahun dan lebih, tinggal dalam masyarakat iaitu di daerah Limbongan, bukan warga tua yang tinggal terasing di rumah orang tua. Penduduk yang berumur 60 tahun dan lebih dipilih untuk kajian ini kerana memenuhi definisi warga tua iaitu apabila mereka berumur dalam lingkungan 60 tahun dan lebih. Seramai 214 orang warga tua dipilih sebagai responden. Mereka dipilih menggunakan persampelan rawak mudah. Jumlah tersebut merupakan 20 peratus daripada keluarga yang mempunyai warga tua di daerah Limbongan. Penentuan 20 peratus daripada semua keluarga yang mempunyai warga tua dibuat berdasarkan jumlah sebanyak itu dianggap mewakili populasi (Rohana, 2004). Lagipun jumlah sampel yang besar tidak diperlukan untuk menyelidik populasi yang homogen sifatnya (Downie & Starry, 1977). Sebelum kajian sebenar dilakukan, satu kajian rintis telah dilakukan terlebih dahulu. Daripada kajian rintis ini didapati warga tua di kawasan kajian adalah tidak jauh berbeza di antara satu sama lain. Mereka mempunyai ciri-ciri sosial yang lebih kurang sama.

Oleh kerana daerah Limbongan terdiri daripada enam mukim (iaitu Mukim Penghulu, berdasarkan mukim yang diberikan oleh Pejabat Peggawa) yang mempunyai jumlah warga tua yang berbeza-beza, maka bilangan warga tua bagi setiap mukim juga ditentukan berdasarkan 20 peratus daripada keluarga yang mempunyai warga tua. Proses untuk mengenal pasti responden dilakukan berdasarkan senarai isi rumah yang mengandungi nama warga tua yang telah disenaraikan (Jadual 2). Data dikumpul menggunakan soal selidik dan pemerhatian. Data yang diperolehi melalui soal selidik dianalisis menggunakan teknik statistik deskriptif. Manakala data yang diperolehi melalui pemerhatian dianalisis menggunakan pendekatan deskriptif.

Jadual 2

Taburan Responden Mengikut Mukim di Daerah Limbongan

Mukim*	Keluarga	Keluarga Yang Ada Warga Tua	Responden
Pengkalan	1513	291	59
Gong Chapa	2632	160	32
Wakaf Bunut	1822	145	29
Alor Pasir	1417	125	25
Tok Adam	279	105	20
Bandar	1132	241	49
Jumlah	8795	1067	214

Sumber. Pejabat Penggawa, Pasir Puteh, 1996

* Pembahagian mukim berdasarkan Mukim Penggawa

Hasil Kajian dan Perbincangan

Ciri-Ciri Sosial Warga Tua

Ciri-ciri sosial warga tua yang dikaji dalam kajian ini ialah daripada aspek jantina, umur, status perkahwinan, tempoh perkahwinan, jumlah anak, pendidikan dan pekerjaan. Pada kebiasaannya, dalam kebanyakan masyarakat, warga tua perempuan lebih ramai berbanding warga tua lelaki. Fenomena penuaan seperti ini adalah fenomena global yang terjadi disebabkan oleh jangka hayat perempuan yang lebih panjang. Hasil kajian ini menunjukkan sebahagian besar warga tua adalah lelaki. Lebih separuh daripada mereka berumur 69 tahun dan kurang (Jadual 3).

Jadual 3

Taburan Ciri-Ciri Sosial Warga Tua

Ciri-Ciri Sosial	Kekerapan	Peratus
Jantina		
Lelaki	131	61.2
Perempuan	83	38.8
Umur		
60-64 tahun	83	38.8
65-69 tahun	43	20.1

(sambungan)

Ciri-Ciri Sosial	Kekerapan	Peratus
70-74 tahun	47	22.0
75 tahun dan Lebih	41	19.1
Status Perkahwinan		
Berkahwin	143	66.8
Berceraai	4	1.9
Balu/Duda	64	29.9
Bujang	3	1.4
Tempoh Perkahwinan		
Baru	13	9.0
Lama	130	91.0
Jumlah Anak		
Ada	208	97.2
Tiada	6	2.8
Pendidikan		
Sekolah	91	42.5
Tidak Sekolah	123	57.5
Pekerjaan		
Bekerja	88	41.1
Tidak Bekerja	126	58.9
Jumlah	214	100.0

Selain itu, sebahagian besar daripada warga tua didapati berstatus kahwin. Terdapat juga sebahagian daripada mereka yang berstatus balu atau duda akibat kematian pasangan. Bagi mereka yang berstatus kahwin pada umumnya sudah berumahtangga melebihi 30 tahun. Mereka yang melaporkan masih baru berumah tangga adalah terdiri daripada mereka yang mendirikan perkahwinan kali kedua selepas kematian pasangan pertama. Mereka ini kebanyakannya adalah warga tua lelaki yang kematian isteri. Kajian ini juga mendapati majoriti daripada warga tua mempunyai anak. Jumlah mereka yang tidak mempunyai anak adalah terlalu kecil iaitu hanya 2.8 %. Dari segi pendidikan, jumlah mereka yang bersekolah dan tidak bersekolah adalah hampir sama, dan ada antara mereka yang masih bekerja walaupun kebanyakannya sudah melaporkan tidak lagi bekerja (Jadual 3). Kebanyakan warga tua tidak bekerja disebabkan masalah kesihatan yang tidak mengizinkan. Warga tua yang bekerja pula kebanyakannya adalah untuk menampung kehidupan. Mereka ini terpaksa terus bekerja disebabkan tidak mempunyai sumber pendapatan yang boleh menyokong kehidupan mereka.

Hubungan Warga Tua dengan Anak Dewasa

Daripada 214 orang warga tua yang terpilih, 200 orang daripada mereka mempunyai anak yang sudah berkahwin. Daripada jumlah ini, 34 orang warga

tua mempunyai anak berkahwin yang tinggal bersama atau berdekatan dan 166 orang mempunyai anak berkahwin yang tinggal di luar kampung. Warga tua yang masih mempunyai anak yang belum berkahwin pula berjumlah 83 orang. Daripada jumlah tersebut, 54 orang mempunyai anak berkahwin yang tinggal bersama, sementara 29 orang warga tua mempunyai anak bujang yang tinggal di luar kampung. Analisis hubungan hanya melibatkan 166 orang warga tua dengan anak-anak berkahwin yang tinggal di luar kampung. Dalam keadaan tertentu, 29 orang anak bujang yang tidak tinggal bersama juga diambil kira untuk tujuan perbandingan. Terdapat tiga aspek hubungan warga tua yang diberikan tumpuan iaitu: (1) bentuk hubungan, (2) kekerapan hubungan, dan (3) kualiti hubungan di antara warga tua dengan semua sumber.

Bentuk Hubungan

Kajian mendapati warga tua menganggap anak dewasa mereka adalah sumber hubungan sosial yang penting. Terdapat dua bentuk hubungan yang ketara antara warga tua dengan anak-anak iaitu ziarah menziarah dan hubungan melalui telefon. Warga tua ditanya sama ada anak-anak dewasanya yang sudah berkahwin dan tinggal di luar kampung datang menziarah atau menelefon dalam masa seminggu sebelum kajian ini dilakukan. Pertanyaan ini bertujuan untuk melihat adakah warga tua berkongsi masa bersama dan melakukan aktiviti bersama dengan anak-anak dewasa mereka. Mancini dan Blieszner (1989) menyatakan kekerapan warga tua menghabiskan masa bersama dengan anak-anak dan bagaimana mereka berhubung boleh menggambarkan kualiti hubungan di antara keduanya. Cara warga tua berhubung dengan anak mereka dianggap sebagai indikator penting yang menunjukkan hubungan di antara ibu bapa dengan anak-anak.

Dalam konteks ziarah, semua anak yang belum berkahwin datang menziarah ibu bapa yang sudah tua di kampung. Oleh kerana sebahagian daripada anak ini tinggal agak jauh, tidak semua anak berkahwin datang menziarah warga tua dalam masa seminggu sebelum kajian dilakukan. Walaupun mereka tinggal berjauhan dan tidak dijumpai datang pada masa seminggu sebelum kajian, tetapi pada masa-masa yang lain, mereka terus mengadakan hubungan dengan warga tua melalui telefon bagi warga tua yang ada telefon atau dengan cara menziarah atau pulang ke kampung. Daripada 166 orang warga tua yang mempunyai anak berkahwin yang tinggal di luar kampung, empat daripada warga tua (2.4 %) melaporkan anak mereka tidak pernah datang menziarah. Mereka ini bukan sahaja tidak datang menziarah dalam masa seminggu daripada tarikh kajian, malah mereka boleh dikatakan tidak pernah datang menziarah sejak beberapa tahun kebelakangan ini. Mereka ini terdiri daripada seorang warga tua daripada mukim Wakaf Bunut, seorang warga tua daripada mukim Tok Adam dan dua orang warga tua daripada mukim Bandar.

Apabila ditanya dengan lebih mendalam kepada salah seorang warga tua mengapa anak-anak tidak pernah datang menziarahi, beliau menyatakan bahawa perselisihan antaranya dengan anak-anak adalah salah satu sebab mengapa anak-anak tidak mahu balik menemui ibu bapa di kampung. Menurut warga tua ini anaknya bekerja sebagai askar, pada asalnya dia menyayangi ibu bapanya. Setelah berkahwin dengan seorang anak dara dari bandar Kota Bharu, hubungan mereka mula berubah. Isterinya ini memandang jijik kepada rumah tangga ibu bapa mertuanya, tidak mahu balik apabila diajak menziarahi dan seolah-olah malu mendapat ibu bapa mertua yang tua lagi miskin. Akhirnya perselisihan terjadi, dan anaknya sendiri menyebelahi isterinya dan membelakangkan ibu bapanya. Warga tua ini kemudiannya menganggap anaknya sudah memutuskan hubungan dengan mereka.

Berdasarkan pemerhatian, warga tua ini memang miskin. Jika dibandingkan dengan rumah warga tua lain di kampung tersebut umpamanya, rumahnya adalah kecil dan buruk. Dinding rumahnya dibuat daripada papan yang sudah lusuh. Bumbungnya dibuat daripada zing dan sudah bertampal di sana sini. Bumbung bahagian dapurnya banyak yang sudah bocor. Apabila musim hujan tiba, air melimpah, menimbulkan rasa kurang selesa apabila memasak. Kemungkinan keadaan inilah menyebabkan menantu perempuannya keberatan untuk pulang menziarah. Anak-anak yang lain didapati sering menziarahi ibu bapa mereka di kampung. Anak-anak yang tinggal jauh, walaupun mereka jarang balik ke kampung, mereka tidak memutuskan hubungan dengan keluarga mereka. Kebiasaan menziarah ibu bapa di kampung seperti ini juga telah ditunjukkan oleh beberapa orang pengkaji yang mengkaji hubungan antara anak dengan ibu bapa. Strange (1980) dalam kajiannya di negeri Terengganu, umpamanya telah menunjukkan anak dalam keluarga Melayu sering melawat ibu bapa mereka di kampung. Dalam *socioeconomic consequences survey*, Masitah dan Nazileh (1988), juga menunjukkan anak-anak sering menziarah warga tua.

Selain ziarah, terdapat juga sebilangan warga tua yang memiliki telefon dan berhubungan dengan anak-anak mereka melalui telefon. Walau bagaimanapun, jumlahnya tidak ramai. Daripada 166 orang warga tua yang mempunyai anak berkahwin yang tinggal di luar kampung, 63 orang daripada mereka didapati memiliki telefon. Oleh itu, telefon juga adalah satu cara anak dewasa berhubungan dengan warga tua di kampung. Daripada temu bual tidak berstruktur yang dilakukan dengan beberapa orang warga tua dan juga dengan beberapa orang anak dewasa di kawasan kajian yang telah bermigrasi ke bandar-bandar, didapati faktor jarak tempat tinggal mereka yang jauh menyebabkan mereka lebih kerap berhubungan dengan ibu bapa melalui telefon. Oleh sebab faktor jarak, telefon adalah satu cara mudah bagi mereka untuk berhubung dengan warga tua di kampung. Tetapi jika ibu bapa tidak mempunyai telefon, mereka terpaksa bertanya khabar berita ibu bapa melalui adik beradik atau

jiiran tetangga yang mempunyai telefon dan yang tinggal berdekatan dengan ibu bapa mereka. Sekiranya adik beradik atau jiran tetangga yang tinggal berdekatan dengan ibu bapa mereka tidak mempunyai telefon, maka hubungan di antara mereka dengan warga tua hanya menunggu masa mereka balik ke kampung.

Kekerapan Hubungan

Daripada data yang diperoleh, kekerapan menziarah adalah tidak sama antara seorang anak dengan anak yang lain. Terdapat warga tua yang melaporkan anak dewasanya selalu datang menziarahi, menziarahi sebulan sekali dan ada yang menziarahi lebih dua bulan sekali. Anak dewasa yang tinggal berdekatan pada umumnya sering menziarahi ibu bapa. Namun, bagi anak dewasa yang tinggal jauh, mereka didapati jarang menziarahi ibu bapa.

Dari segi kategori anak dewasa, kajian ini mendapati anak dewasa yang belum berkahwin ada yang selalu datang menziarahi ibu bapa mereka (34.5%), ada yang datang menziarahi sebulan sekali (31.0%) dan ada yang datang menziarahi lebih dua bulan sekali (34.5%). Manakala anak dewasa yang berkahwin pula, keadaannya agak berbeza sedikit. Anak dewasa yang sudah berkahwin didapati jarang menziarahi ibu bapa mereka dan kebanyakan mereka menziarahi ibu bapa melebihi dua bulan sekali. Jumlah mereka yang selalu datang menziarahi adalah kecil (15.1%). Kekerapan menziarahi warga tua melebihi dua bulan sekali ialah 37.3% (Jadual 4).

Jadual 4

Kekerapan Menziarah Warga Tua

Ziarah	Kekerapan	Peratus
Selalu	25	15.1
Sebulan Sekali	53	31.9
Dua Bulan Sekali	22	13.3
Lebih Dua Bulan Sekali	62	37.3

Apabila ditanya mengenai berapa lama anak-anak tersebut bermalam, atau menetap di rumahnya sebelum balik semula ke rumah masing-masing, didapati ada anak dewasa, khususnya yang tidak bekerja dengan kerajaan, yang menetap sehingga tiga atau empat hari sebelum balik semula ke rumah mereka. Ada juga sebahagian besar datang menziarahi dan menetap sekadar satu atau dua hari sahaja. Waktu paling lama anak-anak ini menetap di rumah

ibu bapa mereka ialah pada musim perayaan atau pada musim cuti sekolah. Pada musim cuti sekolah, mereka mempunyai masa yang lebih panjang untuk menetap di rumah ibu bapa mereka kerana pada waktu itu anak-anak yang bersekolah sedang bercuti. Musim perayaan yang lain juga merupakan masa yang sesuai bagi anak dewasa ini datang menziarahi ibu bapa mereka, kerana pada waktu itu pada umumnya cuti umum diberikan kepada pekerja di sektor awam termasuk sekolah. Selain itu, waktu ada kenduri kendara atau warga tua serta sanak saudara sakit di kampung.

Berdasarkan pemerhatian yang dilakukan, kekerapan anak dewasa menziarahi warga tua ini bergantung kepada faktor jarak tempat tinggal, kemudahan pengangkutan anak-anak dan kedudukan ibu bapa sama ada tinggal bersendirian atau bersama anak-anaknya yang lain. Anak dewasa yang tinggal berdekatan akan lebih sering menziarahi ibu bapa mereka berbanding dengan anak dewasa yang tinggal berjauhan. Kajian ini mendapati kebanyakan warga tua mempunyai anak dewasa yang tinggal di daerah yang sama dengan mereka atau di daerah sekitar. Terdapat juga warga tua yang mempunyai anak dewasa yang tinggal berjauhan iaitu di Kuala Lumpur. Anak yang tinggal berjauhan dengan ibu bapa ini jarang pulang menemui ibu bapa mereka. Di samping anak dewasa yang mempunyai kenderaan sendiri juga didapati mempunyai kecenderungan untuk lebih kerap menziarahi ibu bapa mereka di kampung.

Oleh itu, faktor utama yang mewujudkan perbezaan dalam pola kekerapan menziarahi warga tua adalah jarak tempat tinggal anak dewasa. Bagi anak yang tinggal lebih dekat, mereka akan selalu datang menziarahi, terutama pada hujung minggu dan bermalam di rumah ibu bapa mereka selama satu atau dua malam. Anak yang tinggal lebih jauh, akan menziarahi warga tua dalam selang masa yang agak lama sebelum datang menziarahi semula. Begitu juga sekiranya warga tua tinggal bersama anak lain, anak-anak dewasa yang lain selalunya agak jarang menziarahi disebabkan anak yang tinggal bersama warga tua ini selalunya sudah dianggap boleh diharapkan untuk menjaga warga tua itu sendiri.

Salah seorang anak yang tinggal di Kuala Lumpur kebetulan pulang ke rumah warga tua sewaktu kajian dilakukan menyatakan faktor jarak mempengaruhi kekerapannya menziarahi ibu bapa kerana jarak yang jauh menyusah dan melambatkan perjalanan. Berdasarkan pendapat anak dewasa yang ditemui ini, jarak juga boleh mempengaruhi cara berinteraksi dan juga jenis sokongan yang dapat diberikan kepada warga tua. Oleh kerana anak dewasa ini tinggal berjauhan, maka dia tidak dapat secara kerap mengunjungi ibu bapanya di kampung. Anak-anak lain yang tinggal berjauhan juga jarang mengadakan kunjungan. Hal ini bererti semakin jauh tempat tinggal warga tua dengan anak dewasanya, semakin jarang interaksi jenis ini dapat dilakukan. Jarak geografi boleh mengurangkan jumlah interaksi antara ahli keluarga.

Cara berinteraksi dapat dilakukan melalui beberapa cara, iaitu melalui ziarah menziarahi, telefon dan juga surat menyurat. Cara yang paling mudah dilakukan apabila tinggal berjauhan ialah melalui telefon, itupun jika ibu bapa mempunyai telefon di rumah. Komunikasi melalui telefon atau surat menyurat boleh mengurangkan aspek negatif akibat jarak geografi ini. Bentuk pertolongan juga boleh dipengaruhi oleh jarak geografi. Seorang anak dewasa menyatakan bahawa bentuk perkhidmatan yang dapat diberikan olehnya kepada ibu bapa yang tinggal berjauhan hanyalah melalui hantaran wang sahaja. Anak dewasa ini juga percaya kekerapan berinteraksi di antara seorang anak dengan ibu bapa mempunyai perkaitan dengan kuat atau longgarnya ikatan kekeluargaan. Jika hubungan kekeluargaan adalah longgar, maka anak-anak dewasa akan jarang menziarahi ibu bapa mereka.

Seorang anak dewasa yang ditemui dalam kajian ini menyatakan dia sendiri jarang balik menziarahi ibu bapanya yang sudah tua. Bagaimanapun, hubungan kekeluargaan di antaranya dengan ibu bapanya adalah rapat. Mereka terpaksa berpisah jauh disebabkan bekerja di Kuala Lumpur dan kini dia telah berumah tangga serta menetap di Kuala Lumpur. Walaupun dia jarang balik menziarahi ibu bapanya disebabkan tempat tinggal agak jauh dan kini sudah mempunyai beberapa orang anak, tetapi hatinya sentiasa 'ingat' kepada ibu bapa di kampung. Walaupun dia tinggal berjauhan, hubungannya dengan ibu bapa masih tetap terjalin erat, terutamanya melalui hantaran perbelanjaan setiap bulan melalui surat.

Pembandaran dan perindustrian telah memisahkan ahli keluarga di kawasan kajian daripada terikat kepada keluarga luas. Kewujudan pusat-pusat industri yang bertempat di luar kawasan kajian, menyebabkan keluarga luas di kawasan kajian menjadi runtuh dan kebanyakan ahli keluarga terutama generasi muda, bermigrasi untuk menetap di tempat-tempat di mana mereka bekerja dan dengan itu tempat tinggal ahli keluarga menjadi terpisah antara satu sama lain, yang akhirnya institusi keluarga luas di kawasan kajian mulai menjadi runtuh. Dalam masyarakat Melayu terdapat konsep 'balik kampung', iaitu satu konsep yang menggambarkan aktiviti anak-anak yang tinggal di luar kampung atau hidup di perantauan, pada masa-masa tertentu, balik semula ke kampung menziarahi ibu bapa atau keluarga di kampung. Setiap anak yang berhijrah ke perantauan mempunyai ikatan emosi dan sentimen yang kuat untuk pulang ke kampung halaman menemui ibu bapa mereka di rumah.

Daya tarik untuk balik kampung menjadi amat kuat sekali apabila ibu bapa yang menjadi penanggung keluarga asas masih hidup. Walaupun anak-anak dewasa hidup terpisah-pisah, mereka selalu balik ke kampung untuk bertemu ibu bapa atau adik beradik yang lain. Bahkan bagi ahli keluarga yang erat hubungan kekeluarganya, pada setiap hari raya, khususnya hari Raya Puasa,

mereka akan berkumpul di rumah ibu bapa merayakan hari raya bersama. Apabila kedua ibu bapa keluarga asas telah meninggal, tarikan kepada balik kampung menjadi tidak lagi kuat dan ikatan kekeluargaan akan menjadi lebih longgar dan seterusnya amalan balik kampung tidak lagi menjadi amalan yang berpola dalam kalangan anak dewasa seperti ini. Sebaliknya, mereka pula yang akan menjadi 'orang tua' kepada anak-anak mereka.

Boleh dikatakan hampir keseluruhan anak dewasa yang belum berkahwin iaitu bagi ibu bapa yang mempunyai telefon, berhubungan dengan warga tua melalui telefon. Purata kekerapan ialah empat kali sebulan. Berdasarkan bentuk dan kekerapan berhubungan ini, dapat dikatakan warga tua di kawasan kajian bukanlah warga tua yang tersisih daripada anak-anak. Mereka saling berhubungan dan boleh dikatakan membentuk keakraban dalam berjauhan. Keadaan begini didapati tidak jauh berbeza dengan rumusan kebanyakan para pengkaji yang mengkaji hubungan antara anak dengan ibu bapa di luar Malaysia seperti Bengtson, Culter, Mangan dan Marshall (1985) serta Rossi dan Rossi (1990) yang menunjukkan kebanyakan warga tua cenderung memilih tinggal berhampiran dengan anak-anak dan meneruskan hubungan yang berterusan dengan anak dewasa walaupun mereka tinggal berjauhan antara satu sama lain.

Kualiti Hubungan

Analisis ke atas kualiti hubungan diteliti untuk mengenal pasti sejauh mana warga tua di kawasan kajian saling berhubungan dengan anak-anak dewasa mereka yang sudah berkahwin dan tinggal jauh. Kualiti hubungan antara warga tua dengan anak dewasa mereka perlu dianalisis kerana boleh mempengaruhi kesejahteraan warga tua (Umberson, 1989). Seperti juga kualiti hubungan antara warga tua dengan pasangannya, kualiti hubungan dalam bahagian ini juga diukur dengan menggunakan cara pengukuran yang sama iaitu menggunakan skala pengukuran kualiti hubungan, pengukuran intimasi, tingkat keakraban serta tingkat persefahaman. Analisis ke atas data yang diperolehi daripada skala kualiti hubungan mendapati 84.1% daripada keseluruhan anak dewasa mempunyai kualiti hubungan yang tinggi dengan warga tua berbanding 15.9% sahaja yang mempunyai kualiti hubungan yang rendah (Jadual 5).

Walaupun kualiti hubungan di antara anak dewasa dengan warga tua adalah memuaskan, tetapi terdapat juga hubungan yang tidak memberangsangkan antara sebahagian kecil anak dewasa dengan warga tua. Apabila ditanya sejauh mana warga tua mempercayai anak dewasa mereka, boleh dikatakan hampir keseluruhan warga tua menyatakan bahawa mereka mempercayai anak dewasa mereka dan mengambil berat tentang anak dewasa tersebut. Terdapat juga sebahagian kecil warga tua yang tidak mempercayai

anak dewasa mereka dan ini adalah disebabkan oleh beberapa insiden yang telah terjadi. Akibat daripada tidak mempercayai anak dewasa tersebut, warga tua ini didapati tidak lagi mengambil tahu tentang anak dewasa mereka.

Jadual 5

Kualiti Hubungan Responden dengan Anak Dewasa

Kualiti Hubungan	Tiada	Sedikit	Banyak	Sangat Banyak
Responden mempercayai anak	0.5	7.0	70.0	22.5
Responden ambil tahu anak	0.5	21.0	56.0	22.5
Anak mempercayai responden	0.5	4.5	73.0	22.0
Anak ambil tahu responden	0.5	6.5	67.5	25.5
Boleh bertolak ansur	1.0	1.5	47.0	50.5
Tiada konflik	0.5	51.5	48.0	0.0
Peratus	0.6	15.3	60.3	23.8

Begitu juga dalam aspek sejauh mana anak dewasa mengambil berat tentang warga tua, didapati tidak ada anak dewasa yang tidak mengambil berat tentang ibu bapa mereka. Walaupun ada antara anak dewasa yang tidak mengambil berat warga tua mereka, tetapi jumlahnya adalah kecil dan tidak signifikan untuk diambil kira. Anak dewasa yang tidak mengambil tahu warga tua atau sebaliknya terdiri daripada anak dewasa yang mengalami masalah dalam hubungan dengan ibu bapa mereka. Mereka juga didapati suka menimbulkan konflik dengan ibu bapa mereka.

Dalam konteks bertolak ansur pula, terdapat kira-kira separuh daripada warga tua yang menyatakan semua anak dewasanya adalah menghormati mereka dan boleh bertolak ansur dengan mereka. Kumpulan warga tua ini merupakan warga tua yang dapat menjalin hubungan yang harmoni dengan anak dewasanya. Begitu juga dengan pernyataan sejauh mana wujudnya konflik, didapati separuh daripada warga tua menyatakan tidak pernah timbul sebarang konflik. Salah seorang warga tua yang ditemui menyatakan konflik (berbalah) antara anak dewasa dengan ibu bapa dalam masyarakat Melayu di kawasan kajian jarang berlaku. Kalaupun ada konflik, kesnya adalah tidak banyak. Hal ini kerana budaya masyarakat Melayu di kawasan kajian itu sendiri yang tidak dapat menerima anak yang berbalah dengan ibu bapa mereka. Bagi anak itu sendiri, kata-kata: “nanti apa orang kata” turut mendorong mereka untuk menghormati ibu bapa dan menghindari perbalahan dengan ibu bapa. Selain itu, agama Islam juga melarang seseorang anak menderhaka sama ada melalui perbuatan atau perkataan yang boleh menyakitkan atau mengecilkan hati ibu bapa. Oleh itu, setiap anak sejak dari kecil lagi telah dididik untuk menghormati dan mempunyai rasa tanggung jawab ke atas ibu bapa mereka.

Anak-anak yang sering menimbulkan konflik atau tidak menghormati dan tidak memperdulikan ibu bapa bukan sahaja bertentangan dengan ajaran agama, tetapi juga bertentangan dengan adat kebiasaan masyarakat. Anak-anak seperti ini di kawasan kajian dianggap 'anak derhaka'. Anak derhaka akan dicemuh oleh masyarakat kerana konsep derhaka adalah satu konsep yang negatif dalam masyarakat Melayu, lebih-lebih lagi derhaka kepada kedua ibu bapa sendiri. Menurut warga tua yang ditemui, semua anak dewasa di kawasan kajian seboleh-bolehnya akan menjaga hati ibu bapa supaya tidak dianggap anak derhaka oleh ibu bapa mereka. Bagaimanapun, terdapat juga sebahagian kecil daripada anak dewasa yang berbalah dengan warga tua.

Jika dibandingkan kualiti hubungan antara warga tua dengan anak dewasa dengan kualiti hubungan antara warga tua dengan pasangannya, didapati kualiti hubungan antara warga tua dengan anak dewasa adalah lebih rendah. Manakala kualiti hubungan antara warga tua dengan pasangan adalah lebih tinggi. Hal ini bererti warga tua adalah lebih rapat dan lebih intim dengan pasangan mereka. Antara faktor yang menjadikan hubungan warga tua dengan pasangan mereka lebih rapat dan intim ialah disebabkan oleh sikap saling percaya mempercayai, saling mengambil tahu, tidak suka mencari kesalahan masing-masing dan tiada konflik antara keduanya. Namun, terdapat juga sebahagian kecil daripada warga tua yang tidak mempercayai dan tidak mengambil tahu tentang pasangan mereka.

Kualiti hubungan antara anak dengan ibu bapa adalah penting diwujudkan kerana boleh mempengaruhi sokongan yang diterima oleh ibu bapa semasa tua. Daripada pemerhatian yang dilakukan, terdapat beberapa faktor yang menyumbang kepada kualiti hubungan antara anak dengan ibu bapa. Antaranya faktor jantina ibu bapa didapati mempunyai pengaruh yang penting ke atas kualiti hubungan antara anak dengan ibu bapa. Warga tua wanita didapati mempunyai kualiti hubungan yang lebih baik berbanding warga tua lelaki. Keadaan ini mungkin kerana warga tua wanita di kawasan kajian ini lebih mesra, lebih mengambil berat dan lebih menyayangi anak-anak berbanding warga tua lelaki. Sikap warga tua wanita ini menjadikan kualiti hubungan di antara mereka dengan anak-anak lebih baik berbanding warga tua lelaki.

Daripada pemerhatian dan perbualan dengan anak-anak muda di kawasan kajian, didapati hubungan anak lebih akrab dengan ibu berbanding dengan bapa. Mereka lebih suka berbual dan menganggap ibu sebagai kawan, manakala bapa dianggap sebagai orang yang ditakuti. Mereka 'hormati' kepada ibu, tetapi 'takut' kepada bapa. Oleh kerana takut, anak-anak muda didapati kurang mesra dengan bapa mereka. Hubungan anak-anak dengan bapa adalah lebih formal. Mereka jarang bercakap dan walaupun bercakap, mereka hanya

bercakap perkara-perkara yang penting sahaja. Terdapat juga antara anak-anak ini yang enggan berkomunikasi dengan bapa dan menjadikan ibu sebagai orang perantaraan untuk menyampaikan hasrat. Malah terdapat anak muda yang tidak berani berkelakuan tidak sopan di rumah kerana takut dimarahi bapa. Dalam situasi ini, warga tua lelaki pula merasa bangga jika anak-anak takut kepada mereka dan jarang berkomunikasi dengan mereka.

Dalam masyarakat Melayu, ada kecenderungan bahawa anak adalah lebih akrab dengan ibu berbanding bapa. Anak-anak lebih selesa menganggap ibu sebagai kawan untuk berbual di waktu lapang atau mengadu hal di waktu susah. Sekiranya berlaku konflik antara adik beradik atau antara anak dengan bapa, ibulah yang akan menjadi orang tengah menyambung semula hubungan yang retak. Keadaan ini, berdasarkan kepada pandangan beberapa orang warga tua yang ditemui, adalah disebabkan ibu lebih menyayangi anak kerana telah melalui penderitaan yang lama semasa mengandung anaknya atau terpaksa menderita kekurangan tidur semasa membesarkan anak. Dengan penderitaan yang dialami ini menjadikan perasaan ibu lebih halus dan merasa lebih menyayangi anaknya berbanding bapa.

Warga tua yang berkahwin juga, disebabkan kemesraan yang wujud dalam keluarga, mempunyai kualiti hubungan yang lebih baik dengan anak-anak dewasa berbanding dengan warga tua yang bercerai. Bagi warga tua yang bercerai dan mempunyai rumah tangga yang porak puranda, apa lagi yang tidak memelihara anaknya sendiri atau melepaskan pemeliharaan anaknya kepada pasangan tanpa mengambil tahu kebajikannya, tidak mempunyai hubungan yang akrab dengan anak-anak. Ada seorang warga tua yang bercerai dengan pasangannya sejak sekian lama, tetapi menyedari hakikat ini dan menyesali dirinya kerana tidak memperdulikan anak menyebabkan sekarang ini dia dibiarkan pula oleh anaknya.

Pendapatan juga menjadi variabel penting yang mempengaruhi kualiti hubungan antara warga tua dengan anak dewasa. Warga tua yang mempunyai pendapatan yang lebih tinggi lebih cenderung mempunyai kualiti hubungan yang lebih baik. Keadaan ini disebabkan sumbangan yang dapat diberikan oleh warga tua kepada anak cucu, menjadikan hubungan mereka lebih baik. Pemerhatian yang dibuat juga mendapati sumbangan yang dapat diberikan warga tua kepada anak dewasa adalah penting untuk menjaga dan meningkatkan kualiti hubungan. Sekiranya warga tua boleh diharapkan menjaga cucunya semasa anak dewasanya bekerja, maka hubungan di antara warga tua dengan anak dewasanya lebih rapat. Cucu boleh berfungsi sebagai pengikat kasih sayang di antara anak dewasa dengan warga tua. Terdapat kes seorang anak dewasa yang bekerja di Kuala Lumpur telah meninggalkan anaknya untuk dijaga oleh warga tua tersebut di kampung. Hubungan mereka lebih rapat disebabkan warga tua itu sendiri mempunyai peranan ke atas anaknya. Anak

ini pula selalu balik ke kampung menemui anaknya dan pada masa yang sama menemui emaknya yang sudah tua.

Berdasarkan kepada pengukuran tingkat keakraban, lebih separuh daripada warga tua (68.5 peratus) menyatakan mempunyai hubungan yang erat dengan anak dewasa mereka. Jumlah warga tua yang menyatakan sangat erat dengan anak dewasa juga adalah besar iaitu 27.0 peratus. Warga tua yang tidak erat dengan anak dewasa berjumlah 0.5 peratus. Warga tua yang kurang erat juga boleh dikatakan terlalu kecil iaitu 4.0 peratus. Ini menunjukkan bahawa hubungan di antara mereka dengan anak dewasa di kawasan kajian adalah erat. Berdasarkan pernyataan intimasi pula, ada sebilangan kecil warga tua yang memberikan jawapan tidak setuju dan sangat tidak setuju dengan pernyataan-pernyataan yang ditanyakan kepada mereka.

Bagi pernyataan “kami saling menyayangi” umpamanya, kira-kira 25.5 peratus daripada warga tua sangat bersetuju dengan pernyataan ini dan sebahagian besar mereka (72.0 peratus) bersetuju dengan pernyataan tersebut. Warga tua yang tidak bersetuju dengan pernyataan ini hanya 2.5 peratus. Peratus yang hampir sama juga diperoleh daripada pernyataan “kami saling mempercayai”. Tentang pernyataan “kami saling boleh menerima kritikan”, warga tua yang menyatakan mereka “tidak boleh saling menerima kritikan” berjumlah 5.5 peratus. Jawapan daripada pernyataan “kami saling menghormati” dan “kami tidak mementingkan diri sendiri” juga tidak jauh berbeza dengan jawapan kepada pernyataan “kami saling menerima kritikan” (Jadual 6).

Analisis kualiti hubungan melalui tingkat persefahaman juga mendapati kualiti hubungan di antara sebahagian besar warga tua dengan anak dewasa di kawasan kajian adalah baik. Berdasarkan persepsi warga tua itu sendiri, daripada 200 orang warga tua yang mempunyai anak dewasa yang tinggal berjauhan, 83.5 peratus menyatakan pandangan mereka tentang suatu masalah adalah lebih kurang sama dengan pandangan anak dewasa mereka. Terdapat 5.5 peratus daripada mereka menyatakan pandangan mereka dengan anak dewasa selalu berbeza. Antara mereka selalu wujud pertentangan pendapat. Proporsi warga tua yang menyatakan pandangan mereka adalah selalu sama dengan pandangan anak dewasa mereka pula adalah besar iaitu 11 peratus. Berdasarkan kepada jawapan skala kualiti hubungan, tingkat keakraban, intimasi dan tingkat persefahaman yang diperoleh, maka dapat dirumuskan bahawa kualiti hubungan antara warga tua dengan anak dewasa adalah memuaskan. Warga tua adalah akrab dengan anak dewasa dan menganggap hubungan di antara mereka adalah penting kerana anak adalah sebagai jaminan sosial dan emosi. Oleh sebab itu, warga tua akan terus menjaga agar hubungan tersebut tetap akrab.

Jadual 6

Intimasi Warga Tua dengan Anak Dewasa

Intimasi	Sangat Setuju	Setuju	Tidak Setuju	Sangat Tidak Setuju
Saling menyayangi	25.5	72.0	2.5	0.0
Saling mempercayai	21.5	76.5	2.0	0.0
Saling terima kritikan	10.5	68.5	5.5	1.0
Saling menghormati	27.0	71.5	1.0	0.5
Tidak mementing diri	17.0	79.0	4.0	0.0
Peratus	20.9	75.7	3.1	0.3

Kesimpulan

Sebagai kesimpulannya anak dewasa adalah penting sebagai sumber jaringan hubungan sosial warga tua. Hubungan warga tua dalam kajian ini telah dianalisis dari segi bentuk, kekerapan dan kualiti. Terdapat dua bentuk hubungan yang ketara, iaitu ziarah menziarahi dan juga hubungan melalui telefon. Dalam konteks ziarah, oleh kerana sebahagian anak dewasa yang telah berkahwin tinggal berjauhan, maka tidak semua mereka datang menziarahi warga tua dalam masa seminggu sebelum kajian. Walaupun begitu, pada masa yang lain, mereka terus mengadakan hubungan dengan warga tua melalui telefon khususnya bagi warga tua yang mempunyai telefon. Kekerapan menziarahi warga tua adalah tidak sama di antara anak dewasa. Kekerapan menziarahi warga tua ini bergantung kepada faktor jarak, kemudahan pengangkutan anak-anak dan juga kedudukan ibu bapa yang tinggal bersendirian atau bersama anak-anaknya yang lain. Anak dewasa yang tinggal berdekatan akan lebih sering melawat warga tua berbanding dengan anak dewasa yang tinggal berjauhan. Walaupun jarang balik disebabkan tempat tinggal agak jauh tetapi hati anak-anak sentiasa ingat kepada ibu bapa di kampung yang menjadikan konsep balik kampung masih diamalkan. Kebanyakan anak dewasa mempunyai kualiti hubungan yang tinggi dengan warga tua. Konflik antara anak dengan ibu bapa atau *berbalah* dalam dialek tempatan jarang berlaku. Faktor ini kerana budaya masyarakat Melayu di kawasan kajian tidak dapat menerima anak yang berbalah dengan ibu bapa mereka.

Rujukan

Aldous, J., Klaus, E., & Klein, D. M. (1985). The understanding heart: Aging parents and their favorite child. *Child Development*, 56, 303–316.

- Angres, S. (1975). *Intergenerational relations and value congruence between young adults and their mothers* (Unpublished doctoral dissertation). University of Chicago.
- Antonucci, T. C. (1985). Personal characteristics, social support and social behavior. Dlm. Robert H. Binstock & Ethel Shanas (Pnyt.), *Handbook of aging and the social sciences*. New York: Van Nostrand Reinhold.
- Atchley, R. C. (1988). *Aging: Continuity and change*. Belmont, California: Wadsworth Publishing.
- Bengtson, V. L., Culter, N. E., Mangen, D. J., & Marshall, V. W. (1985). Generations, cohorts, and relations between age groups. Dlm. R. H. Binstock & E. Shanas (Pnyt.), *Handbook of aging and the social sciences* (2nd ed.). New York: Van Nostrand Reinhold.
- Cantor, M., & Little, V. (1985). Aging and social care. Dlm. R. H. Binstock & E. Shanas (Pnyt.), *Handbook of aging and the social sciences* (2nd ed.). New York: Van Nostrand Reinhold.
- Cantor, M. H. (1980). *Caring for the frail elderly: Impact on family, friends and neighbors*. Kertas kerja The Annual Meeting of The Gerontological Society of America, San Diego.
- Cicirelli, V. G. (1981). *Helping elderly parents: The role of adult children*. Boston, Mass.: Auburn House Publishing.
- Kamus Dewan. (1993). Kuala Lumpur: Dewan Bahasa dan Pustaka.
- Downie, N. M., & Starry, A. R. (1977). *Descriptive and inferential statistics*. New York: Harper & Row Publishers.
- Durkheim, E. (1952). *Suicide*. London: Routledge & Kegan Paul.
- Erikson, M., & Empey, L. (1963). Court records, undetected delinquency and decision-making. *Journal of Criminal Law, Criminology and Police Science*, 54, 456–469.
- Gibson, M. J. (1981). *Family support patterns, policies and programs in developed nations*. Kertas kerja Annual Meeting of the Gerontological Society of America, Toronto.
- Gove, P. B. (1966). *Webster's third new international dictionary*. Springfield, Massachuset: G & C Merriam .
- Horowitz, A. (1985). Sons and daughters as caregivers to older parents: Differences in roles performance and consequences. *The Gerontologist*, 25, 612–617.
- Ishak Shari. (1988). *Pembangunan dan kemunduran - perubahan ekonomi luar bandar di Kelantan*. Kuala Lumpur: Dewan Bahasa dan Pustaka.
- Kalish, R. A. (1982). *Late adulthood: Perspectives on human development*. California: Brooks Publishing.
- Kessler, C. S. (1978). *Islam and politics in Malay state: Kelantan 1838 – 1969*. Ithaca: Cornell University Press.
- Kinsella, K., & Wan He. (2009). *An aging world: 2008*. Washington DC: U.S. Government Printing Office.

- Lopata, H. Z. (1979). *Women as widows: Support systems*. New York: Elsevier-North Holland.
- Mancini, J. A., & Blieszner, R. (1989). Aging parents and adult children: Research themes in intergenerational relations. *Marriage and The Family*, 51(1), 275–290.
- Masitah Mohd. Yatim & Nazileh Ramli. (1988). *Socio economic consequences of the ageing of population survey 1986: Malaysia Country Report*. Kuala Lumpur: Lembaga Penduduk dan Pembangunan Negara.
- Moss, M. S., Moss, S. Z., & Moles, E. L. (1985). The quality of relationships between elderly parents and their out-of-town children. *The Gerontologist*, 25, 134–140.
- Myers, G. C. (1990). Demography of aging. Dlm. Binstock & Linda K. George (Pnyt.), *Handbook of aging and the social sciences* (3rd ed.). California: Academic Press.
- Nash, M. (1974). *Peasant citizens: Politics, religion and modernization in Kelantan, Malaysia*. Athens, Ohio: Ohio University Center for International Studies.
- Parson, T., & Bales, R. F. (1956). *Family: Socialization and interaction process*. London: Routledge & Kegan Paul.
- Pertubuhan Bangsa-Bangsa Bersatu. (1991). *Sex and age distributions of population*. Department of International Economics and Social Affairs: New York.
- Raymond Firth. (1990). *Nelayan Melayu: Ekonomi tani mereka*. Kuala Lumpur: Dewan Bahasa dan Pustaka.
- Rohana Yusof. (2004). *Penyelidikan sains sosial*. Bentong: PTS Publications.
- Rosenmayr, L. (1977). The family: A sources of help fort elderly. Dlm. E. Shanas & M.Sussman (Pnyt.), *Family bureaucracy and the elderly*. Durham: Duke University Press.
- Rossi, A. F., & Rossi, P. H. (1990). *Of human bonding: Parent-child relations across the life course*. New York: Aldine de Gruyter.
- Shanas, E. (1980). Older people and their families: The new pioneers. *Marriage and The Family*, February, 9–15.
- Stoller, E. P. (1985). Exchange patterns in the informal support networks of the elderly: The impact of reciprocity on morale. *Marriage and The Family*. May: 335–342.
- Strange, H. (1980). The effect of modernization on rural Malay aged. *Kebajikan Masyarakat*, Jilid 1(2), 19–38.
- Suitor, J. J., & Pillemer, K. (1988). Explaining intergenerational conflict when adult children and elderly parents live together. *Marriage and The Family*, 50, 1037–1047.
- Suitor, J. J. (1984). *Family members support for married mothers return to school*. Kertas kerja Annual Meeting of the New York State Council on Family Relation. New York: September.

- Ting Chew Peh. (1988). *Konsep asas sosiologi*. Kuala Lumpur: Dewan Bahasa dan Pustaka.
- Troll, L., Miller, S. J., & Atchley, R. C. (1979). *Families in later life*. Belmont: Wadsworth.
- Umberson, D. (1989). Relationship with children: Explaining parents' psychological well-being. *Marriage and The Family*, 51(4), 999–1011.
- Umberson, D. (1992). Relationship between adult children and their parents: Psychological consequences for both generation. *Marriage and The Family*, 54 (3), 567–674.
- Walker, K., Macbride, A., & Vachon, M. (1977). Social support networks and the crisis of bereavement. *Social Science and Medicine*, 11, 35–41.
- Wan Ibrahim Wan Ahmad. (1999). *Hubungan sosial, sokongan dan kesejahteraan warga tua: Satu kajian di pedesaan Kelantan* (Tesis PhD tidak diterbitkan). Fakulti Ekologi Manusia, Universiti Putra Malaysia.
- Wan Ibrahim, & Zainab Ismail. (2006). Mendakwah warga tua di Malaysia dan Indonesia. *Islamiyyat*, 28, 3–27.

Wan Ibrahim Wan Ahmad
Pusat Pengajian Pembangunan Sosial
UUM Collge of Arts & Sciences
Universiti Utara Malaysia
06010 UUM Sintok, Kedah, MALAYSIA
wiwa@uum.edu.com.my

Zainab Ismail
Fakulti Pengajian Islam
Universiti Kebangsaan Malaysia
43600 UKM Bangi, Selangor, MALAYSIA
zainab@ukm.my